

حكايات من الغابة



حبايبي الحلوين النهاردة ملك
الغابة كان قاعد فى عرينه بي فكر
فى أحوال الغابة وأزاي هو
مايستريحش أبدا من المشاكل

وقال لنفسه مادام الحمد لله النهاردة الأمن مستتب أخرج
أشم الهوا وفرصة أتفقد الغابة و أحوالها فأخذ زوجته
وأولاده يشموا الهوا بما إن أشغال ملك الغابة منتهية
ومفیش قضایا و مشاكل

شبل وليث أولاده أخذوا معاهم كرة جميلة علشان يلعبوا
بيها وسط الزرع والنجيلة الخضرا

ولكن يظهر إن المشاكل وراه وراه ماهى المسئولية كدا
ياولاد حاجة مش سهلة وكل ما يكبر المنصب تكثر
المشاغل ولما كان ملك الغابة ماشى يتكلم مع زوجته
أسودة ويتناقش معاها فى أمور ومشاكل الأولاد لقى
وزتين واقفين يتخانقوا على بيضة الوزه البيضاء تقول دى
البيضة دى بتاعتى ومن حقى

- لا البيضاء دى من حقىبكت الوزه البيضاء
وأتوسلت للوزه الرصاصى أرجوكى سيبى لى بنتى
- لا دى مش من حقك دى البيضة دى بنتى أنا
ولما أشدت المعركة بين الوزتين وقف الأسد يشوف أيه
المشكلة

- أيه الدوشة دى يا وزه أنتى وهى الحكاية أيه
وبتتخانقنى إنتى وهى ليه

ردت الوزه البيضاء وهى بتبكى ومش قادرة تحكى

ملك الغابة الحقتى يا ملك الغابة أنت اللى هتحكم بالحق

- أحكى يا وزه يا رصاصى على ماتهدى الوزه البيضاء
وتبطل عياط

- أنا أقولك يا ملك الحكاية من البداية للنهاية

أنا لوزة وهى زوزا وأحنا الأثنين عايشين فى عشة واحدة
وبيضنا فى البياضة اللى فى العشة جنب بعض والبيض
إتخلط ببعضه وإتكسر من خناق باقى الوز مع بعضه
مفضلش غير بيضة واحدة ودى بتاعتى ومن حقى

ردت زوزا وهى بتبكى لا والله يا جلالة الملك

إحنا فعلا بيضنا مع بعض لكن أنا لما إتكسر كل البيض
كان فاضل بيضة لسة هبيضها وده لأنها سبقتنى
بيومين ولما لقتنى بضت ضربتتى وقومتتى

- الكلام ده مضبوط يا لوزة

- يا ملك الغابة أوكدك إنها بنتى أنا

فكر الملك وبص للوزتين ولقى زوزا زعلانة أكثر على
بيضيتها ومن أول الخناقة بتبكى بحرقة علشانها
..وبسرعة فكر فى فكرة وقال ترضوا بحكمى

- طبعا يا مولاي

- سليم ..يا أسودة

- أمرك يا ملك الغابة

- أأمرى الحارس يجيب طبق فاضى وحجر صغير

- أمرك يا ملك الغابة

بصى يا وزه أنتى وهى أنا هحكم حكمين والأجابة
هتوضح لى الأم مين

مين فيكم مستعدة ننتف ريشها وندفى بيه بيضيتها؟

- ردت لوزة الدنيا برد يا مولاي وبدل مانتف الريش أرقد
ع البيضة فى العشة..والنتيجة مش هتبقى وحشة

- وأنتى يا زوزا

- أنا لأى شئ مستعدة ومستعدة حتى لنتف الريش
المهم أبنى اللى جوة البيضة يعيش

- مفيش حل تانى يا مولاي الأسد

- طبعا فيه

أحنا نكسر البيضة بالحجر ده ونقسمها نصين

واحدة تاخذ البياض والتانية الصفار

- ردت لوزة اللى تشوفه يا ملك الغابة

صرخت زوزا وقالت... لا. لا. لا يا ملك الغابة متكسرش

البيضة إديه لأمه لوزة ده مش إبنى

أبتسم الأسد وقال يا حراس أدوا البيضة للوزة زوزا

وأقبضوا على الوزة لوزة

بكت لوزة وقالت أنا عملت أيه يا ملك الغابة

أنتى يا لوزة مش أم البيضة والا ماكنتيش وافقتى إنا

نقسمها دا الضنا غالى

أما إنتى يا زوزا فعلا الأم الحقيقية كنتى عايزة تضحى

بريشك وبيضتك علشان اللى جواها يعيش ودا أكبر دليل

على أنك أنتى الأم الحقيقية .

وأخذت زوزا بيضيتها وجريت فرحانة على عشتها

وحكم الأسد تنتقل لوزة لعشة تانية غير عشتها

ونفياها كان جزاءها نظير عملتها

وأبتسم الأسد لأولاده ولأسودة مراته وقال إن مفيش عنده

أغلى من عيلته ولا أعز من أولاده

وبكدا يا أحبائى أحنا فهمنا وأتأكدنا أن مفيش

أجمل من حنان الأم فى كل المخلوقات.

